

金松南

漠

記遷

聞附補遺

志

錄



1111

1112

1113

1114

1115



金

志

宇文懋昭撰

中華書局

叢書集成初編所選古今
說海及歷代小史古今逸
史皆收有此書逸史本較
佳故據以影印

金志目錄

初興本末

初興風土

男女冠服

婚姻

飲食

阜隸

浮圖

道教

科條

赦宥

屯田

田獵

兵制

旗幟

車轍

服色

金
志
目
錄

金志

元

宇文懋昭撰

明

吳琯校

初興本末

金國本名朱里真蕃語舌音訛爲女真或曰慮真避契丹興宗名又曰女直肅慎氏遺種渤海之別族也或曰三韓辰之役挈氏於此地中最微且賤唐貞觀中靺鞨來中國始聞女真之名世居混同江之東長白山下其山乃鴨綠水源南鄰高麗北接室韋西界渤海鐵離東瀕海二國志所謂抱婁元魏所謂句吉

唐所謂黑水靺鞨者今其地也其屬分六部有黑水部卽今女真其水柵之則色微黑契丹目爲混同江深二十丈餘狹處可六七十步闊者至百步居江之南者謂之熟女真以其服屬契丹也江之北者謂之生女真亦臣服于契丹後有酋豪受宣命爲首領號太師契丹自賓州混同江北八十里建寨以守又云契丹乘唐衰併吞諸蕃三古六女真在其中契丹恐女真爲患誘豪右數千家處之遼陽之南而著籍焉分其勢使不得與本國通謂之合蘇款自咸州東北分界入宮口主東沫江中間所居之女真咸隸兵馬

司與其國往來無禁謂之回霸抵凌而野居者謂之黃頭女真又居東沫江之北寧州江之東地方千餘里人戶十餘萬無大君長亦無國名止是族帳散居山谷間自推豪傑爲酋長小者千戶大者數千戶蓋七十二部落之一也僻處契丹東北隅臣屬一百餘年世襲節度使兄弟相傳周而復始或又云其初酋長本新羅人號完顏氏完顏猶漢言王也女真妻之以女生二子其長卽胡來也其自此傳二人以至阿骨打以其國產金及有金水源故稱爲大金

初興風土

女真在契丹東北隅饒裕山林田宜麻穀土產人參
蜜蠟北珠生金細布松實白附子禽有鷹鷄海東青
之類獸多牛馬麋鹿野狗白鼯青鼠貂鼠其人勇悍
好詐貪婪殘忍善騎射喜耕種好漁獵每見野獸之
蹤躡而求之能得其潛藏之所又以樺皮爲角吹作
呦呦之聲呼麋鹿而射之其居多依山谷聯木爲柵
或覆以板與梓皮如牆壁亦以木爲之冬極寒屋纔
高數尺獨開東南一扉扉旣掩復以草綢繆塞之穿
土爲床煨火其下而寢食起居其上厚毛爲衣非人
室不撒衣衣屨稍薄則墮指裂膚雖盛夏如中華初

冬俗勇悍喜戰鬪耐饑渴苦辛騎上下崖壁如飛濟
江河不用舟楫浮馬而渡其樂惟鼓笛其歌惟鷓鴣
曲第高下長短如鷓鴣聲而已其疾病無醫藥尚巫
覡病者殺猪狗以禳之或用車載病者入深山大谷
以避之其親友歿則以刀割額血淚交下謂之送血
淚死者埋之而無棺槨貴者生焚所寵奴婢所乘鞍
馬以殉之其祭祀飲食之物盡焚之謂之燒飯其道
路無旅店行者息于民家主人初則拒之拒之不去
方具飲食而納之其市無錢以物博易無工匠其舍
屋車帳往往自能爲之其禮則拱手退身爲喏跪左

膝蹲右膝拱手搖肘爲拜其節序元旦則拜日相慶重午則射柳祭天稅賦無常隨用度多寡而歛之與契丹言語不通而無文字賦歛科發射箭爲號事急者三射之多以牛驢負物遇雨則張牛革以禦之緩則射獵急則戰鬪宗室皆謂之郎君事無大小皆屬焉

男女冠服

金俗好衣白櫟髮垂肩與契丹異垂金鎖留顙後髮繫以色絲富人用珠金飾婦人辮髮盤髻亦無冠自滅遼侵宋漸有文飾婦人或裹逍遙或裹頭巾隨其所好至于衣服尚如舊俗土產無桑蠶惟多織布貴

賤以布之麤細爲別又以化外不毛之地非皮不可禦寒所以無貧富皆服之富人春夏多以紵絲錦衲爲衫裳亦間用細皮布秋冬以貂鼠青鼠狐貉或羔皮或作紵絲紬絹貧者春夏並用爲衫裳秋冬亦衣牛馬猪羊猫犬魚蛇之皮或獐鹿麋皮爲袴爲衫袴襪皆以皮至婦人衣曰大襖子不領如男子道服裳曰錦裙裙去左右各闕二尺許以鐵條爲圈裹以繡帛上以單裙襲之

婚姻

金人舊俗多指腹爲婚姻旣長雖貴賤殊隔亦不可

渝壻納幣皆先期拜門戚屬偕行以酒饌往少者十餘車多者至十倍飲客佳酒則以金銀器貯之其次以瓦器列於前以百數賓退則分餉焉先以烏金銀杯酌飲貧者以木酒三行進大軟脂小軟脂如中國寒具以進蜜糕人各一盤曰茶食宴罷富者淪建茗留上客數人啜之或以麤者煎乳酪婦家無大小皆坐炕上壻黨羅拜其下謂之男下女禮畢壻牽馬百匹少者十匹陳其前婦翁選子姓之別馬者視之好則留不好則退留者不過十二三或皆不中選雖壻所乘亦以充數大抵以留馬少爲恥女家亦視其數

而厚薄之一馬則報衣一襲壻皆親迎既成壻留于婦家執僕隸役雖行酒進食皆躬親之三年然後以婦歸則婦氏用奴婢數十戶牛馬數十羣每羣九牝一牡以資遣之夫謂妻爲隆隆妻謂夫爲愛根一云婚家富者以牛馬爲幣貧者以女年及笄行歌于途其歌也乃自叙家世婦工容色以伸求侶之意聽者有求娶欲納之卽攜而歸後復方補其禮偕來女家以告父母父死則妻其母兄死則妻其嫂叔伯死則姪亦如之無論貴賤人有數妻

飲食

飲食其鄙陋以豆爲漿又嗜半生米飯漬以生狗血
及蒜之屬和而食之嗜酒好殺釀糜爲酒醉則縛之
俟其醒不爾殺人

阜隸

阜隸出身與蔭人等甚以爲重如州郡都吏出職竝
補將仕郎授錄事判官司徒司判寺丞至儒林亦蔭
子部吏缺人令州縣擇人貢之十年無公私過補昭
信校尉授下縣令或錄事漸爾亦可至知州同州

浮圖

浮圖之教雖貴戚望族多舍男女爲僧尼惟禪多而

律少在京曰國師師府曰僧錄僧正列郡曰都綱縣
曰維那披剃威儀與南宋等所賜號曰大師曰大德
竝賜紫所謂國師在京之老尊宿也威儀如王者國
主有時而拜服真紅袈裟升堂問話講經與南朝等
僧錄僧正師府僧職也皆擇其道行高者限三年爲
一任任滿則又別擇人張官府設人從僧尼有訟者
皆理而決遣之竝服紫袈裟都綱則列郡僧職也亦
以三年爲任有師號者賜紫無者如常僧服維那縣
僧職也僧尼有訟者皆以下決遣之杖以上者竝申
解僧錄都綱司